



SANCTISSIMI IN CHRISTO PATRIS,  
ET DOMINI NOSTRI DOMINI

**BENEDICTI**

DIVINA PROVIDENTIA //

PAPÆ XIV.

**CONSTITUTIO**

SUPER DESIGNATIONE CONFESSA-  
riorum extraordinariorum pro Monialibus.



HISPALI, M.DCC.XLVIII.

---

Ex Typographia D. Florentii Joseph de Blas & Quesada,  
ejusdem Civitatis Typographi Majoris.



# BENEDICTUS EPISCOPUS, SERVUS SERVORUM DEI,

*Ad perpetuam rei memoriam.*



ASTORALIS curæ Nobis imposi-  
tæ munus hanc inter alias sollici-  
tudinem à Nobis exposcit, ut pu-  
sillorum animis in afflictione &  
angustia constitutis opportuna so-  
lacia, ac remedia afferre non ne-  
gligamus, quorum ope interio-  
rem conscientia tranquillitatem  
recuperare, aut conservare va-  
leant, sine qua impossibile est  
debitam Omnipotenti Deo servitutum alacri, & promp-  
ta affectione exhibere. Hujusmodi angoribus, & afflic-  
tionibus confici passim constat Religiosas Mulieres in  
Claustris degentes, quibus certus & unicus Sacramenti  
Pœnitentiæ Minister à Monasterii Prælato ad tres ut  
minimum annos designari solet; cui si aliquando, præ  
pudore, vel alia quapiam de causa, non omnes con-  
scientiæ suæ recessus aperire audeant, atque ideò Con-  
fessiones integritati detrahere incipiant, in barathrum  
perditionis æternæ se ipsas miserè conjiciunt. Quod sanè  
haud rarò evenire, satis Nobis exploratum, atque com-  
pertum est, tum ex iis, quæ in Apostolicæ Pœniten-  
tariæ Officio tractari vidimus, dum olim in minoribus  
constituti plurium annorum spatio munus Doctoris in De-  
ereticis in eodem Officio sustinuimus; tum etiam ex iis,  
quæ in Episcopalis Anconitanæ primùm, deindè in Me-  
tropolitanæ Bononiensis Ecclesiæ regimine, frequenter usit  
cognovimus; tum demùm ex his, quæ sæpius ad Nos in  
Petri Cathedra octavum jam annum diversarum hu-  
jusmodi Monialium, quæ animarum suarum angustias pa-  
ternis oculis Nostri identidem subicere coguntur, live  
ex parte Venerabilium Fratrum Nostrorum Ecclesiarum

*Proœmium.*

*Vigilantia Ponti-  
ficis in procuranda  
conscientiarum se-  
renitate.*

*Præcipue in Mo-  
nialibus, quæ cer-  
tum habent Con-  
fessionarium.*

Antiflitum, qui Nobis earundem Monialium in suis Dice-  
cesibus existentium calamitates, ex præallegata causa or-  
tâs, aut viva voce, aut per Literas non semel repræ-  
sentarunt, ac super ea re Apolliticæ providentiæ opem  
postularunt. Hinc est, quod Nos earum spiritualibus in-  
digentiis per hanc nostram perpetuo valitaram Constitu-  
tionem opportunè prospicere volentes; non quidem in-  
tendimus consultissimam illam, & veteris disciplinæ auc-  
toritate roboratam Legem tollere, aut abrogare, qua  
generalitèr statutum esse dignoscitur, ut pro singulis  
Monialium Monasteriis unus dumtaxat Confessarius de-  
putetur, qui Sacramentales Confessiones universæ earum  
Communitatis excipiat, neque liceat unicuique Moniali  
peculiarem Confessarium pro libitò sibi deligere; sed hoc  
dumtaxat Nobis propositum est constituere, ut si quan-  
do generalis hujusmodi Legis rigor, in peculiaribus ca-  
sibus, non sine animarum detrimento, aut periculo servari  
posse videatur; in promptu sit opportunæ dispensatio-  
nis, & indulgentiæ remedia occurrentibus necessitatibus  
admovere.

*Ideo firma remanente lege de unico Confessario ordinario.*

*De extraordinariis opportunè decernit, ut infra.*

*Sententia Divi Thomæ Aquinatis pro concessione Confess. extraordinar.*

Sanè jam dudùm Sanctus Thomas Aquinas Schola-  
rum Princeps, Ecclesiæque Doctor, in *Supplemento tertiæ Partis, quest. 8. art. 4. ad sextum*, sive in *quartum sententiarum*, ex quo Commentario desumptum est hujusmodi *Supplementum*, hoc Superioribus monitum dedit, ut Subditis suis, quibus certum & unicum Confessarium designare solent, haud difficultèr licentiam concedant confitendi peccata sua alteri Sacerdoti; propter eâ, quod multi infirmi & imbecilles animo reperiuntur, qui potius eligerent sine sacramentali expiatione ex hac vita migrare, quam ipsa peccata certo alieni Sacerdoti à Superiore designato aperire. Jam verò Sacrosancti Concilii Tridentini Patres, hanc legem dillicte sanxerunt, *sess. 25. cap. 10. de Regular.* ut Episcopi, aliique Monasteriorum Prælati, subjectis sibi Monialibus Confessarium extraordinarium, duabus, aut tribus vicibus in singulos annos, exhibere debeant, per hæc verba: *Præter ordinarium autem Confessorem, alius extraordinarius ab Episcopo, aut aliis Superioribus, bis, aut ter in anno offeratur, qui omnium confessiones audire debeat.* Quod quidem non alia de causa præscriptum fuit, quàm quia satis constabat, nonnullas aliquando Moniales esse, quæ nulla ratione adduci possunt, ut aliquod peccatum suum ordinario Confessario confiteantur; adeò ut necesse omninò sit, alterius Confessarii copiam ipsis suppeterere, ut apud hunc de peccatis suis integre, ritè, atque utilitèr confiteri possint. Id ipsum probè  
ani-

*Decretum Concilii Tridentini, ut deputentur bis, aut ter in anno.*

animadvertit Mignus Ecclesiæ Dei Sacerdos S. Carolus Borromæus, qui prædicti Concilii Tridentini absolutio- nem ope sua plurimum juit, ejusque executionem, & ob- servantiam in sua Mediolanensi Civitate & Provincia non sine immensis laboribus & curis invexit; Is enim hac de re ita decrevit: *Præterea Superiores, ex decreto Sacri Tridentini Concilii, quotannis idoneum Confessorem extra- ordinarium Monialibus sibi subjectis exhibeant, cui curent, ut unversæ confiteantur, ut quæ hujusmodi indigent medi- cina, propter aliquem occultum animæ morbum, neque ip- se eam postulare, aut accipere ab usitato Confessore un- quam audeant, liberius mederi suis malis possint, ac Dia- boli laqueos evadere, unâ cum reliquis Confessario novo sua peccata confitendo: uti legere est in Actis Ecclesiæ Mediolanens. impress. anno 1599. pag. 53. in Editione au- tem Lugdunensi, tom. 1. pag. 46.*

Porro quicumque Conciliaris Decreti sensus penitiùs introsperit, non modò salutarem illius providentiam facile agnosceret; sed & circumspectam ejusdem æquitatem mirari debet. Superioribus enim tantummodò injungitur, ut duabus, tribusvè vicibus infra annum, Confessarium extraordinarium Monialibus exhibeant; *his, aut ter in anno offeratur*; Hujusmodi autem Confessarius jubetur earum omnium confessiones excipere, quotquot idem confiteri velint: *Qui omnium confessiones audire debeat.* Neque tamen omnibus & singulis Monialibus præcipitur, ut peccata sua extraordinario Sacerdoti confiteantur. Nihil aliud enim requiritur ab omnibus in Monasterio de- gentibus, tam scilicet à Superiorissa, cæterisque Monia- libus Confessis, atque Novitiis, quàm à Sæcularibus, quæ vel educationis causa, vel alio titulo, in eodem Mo- nasterio cum debitis facultatibus commorantur, nisi ut extraordinario Confessario singulæ se sistant, sive ad Sacramentalem Confessionem apud ipsum, si placuerit, peragendam, sive ad salutaria monita, etiam extra Sa- cramentalem Confessionem, ab ipso accipiendam. Atque ita prudentissimè consultum est, ne, si Moniales aliquæ extraordinarium Confessarium adirent, aliæ autem coram ipso non comparerent, suspiciones, atque oblocutiones excitarentur; & illæ quidem censerentur necessarias ha- buisse causas, ob quas ad extraordinarii opem confugere coactæ essent; aliæ verò ab hujusmodi necessitatibus, & causis immunes judicarentur. Quam agendi rationem com- muni Doctorum calculo comprobata, san. mem. Præde- cessor Noster Clemens Papa XI. Edicto suo (quod est *XVI.*

*Sanctus Carolus Borromæus Decree ti executionem ur- get.*

*Deputatio Con- fess. extraordinar. favorabilis Mo- nialibus.*

*Quæ solùm tenen- tur singulæ coram eo se sistere.*

*Pontifex extendi-  
cupit eandem re-  
gulam ad omnes  
Mulierum Com-  
munitates.*

in secunda Parte ipsius Bullarii) inviolabiliter servari mandavit, eandemque omnium Dioecesum consuetudo recepit. Nec aliud Nobis hac in re addendum superest, nisi, ut Venerabiles Fratres nostros Ecclesiarum Antistites enixe hortemur, ut, quamvis Tridentina Synodus de solis Claustralibus Monialibus in praemisso decreto loquatur, nihilominus eandem disciplinae formam observent, tam cum aliis Monialibus, quae licet Claustrae legibus minimè adstrictae sint, in communitate tamen vivunt; quam cum aliarum quarumcumque Mulierum, aut Puellarum Coetibus, seu Conservatoriis, quoties tam illae, quam istae, unicum Ordinarium Pœnitentiae Ministrum à Superioribus designatum habeant. Quaecumque enim circa Moniales in rigorosa clausura viventes cavenda sunt, eadem in aliis quibuscumque Mulieribus, sive Regularibus, sive Sæcularibus, in Communitate, aut Collegio degentibus, locum habere possunt; ideoque pari providentia, iisdemque remediis arceri, aut emendari debent. Et nos quidem, quum hanc consuetudinem offerendi Confessarios extraordinarios bis, aut ter in anno singulis tam Monialium non Claustralium Communitatibus, quam piis aliarum Puellarum, & Mulierum Coetibus, & Communitatibus in nostra Civitate, & Dioecesi Bononiensi induxerimus; (qua de re extat Edictum nostrum num. LVI. inter Pastorales Institutiones Italico primùm sermone à Nobis vulgaris, deindeque in Latinum conversas) omnibus testari possumus, vel potius debemus, uberem spiritualium utilitatum Massam Nos indè evidentè collegisse.

*Dubia quædam  
circa Concilii De-  
cretum orta decla-  
rat.*

I.

*Ad quem perti-  
neat Confessarium  
extraordinarium  
Monialibus offer-  
re.*

Quum verò super relati Conciliaris Textus intelligentia nonnullæ quæstiones aliàs excitatæ, eademque jam pridem per opportuna Sedis Apostolicæ decreta definitæ fuerint, operæ pretium ducimus hujusmodi definitiones ab omnibus, ad quos spectat, omninò tenendas, atque servandas, his nostris Apostolicis Literis complecti, & auctoritatis quoque nostræ robore communitas, in prædictorum omnium notitiam deducere. Et primò quæsitum fuit, ad quem Superiorem pertineat extraordinarium Confessorem Monialibus deputare, atque offerre: Sed facilis fuit responsio, quam Nos quoque decreto nostro ratam habemus; hujusmodi scilicet deputationem ad eum regularitè spectare, ad quem pertinet Confessarii Ordinarii electio & deputatio; ideoque Episcopus, sive Ordinarius Loci, qui Monialibus sibi subiectis Confessarium Ordinarium dare consuevit, idem Confessarium extraordinarium bis, aut ter in anno, ad normam Tridentinae

tinæ Sanctionis, eisdem offerre tenetur; Prælati vero Regularis, ad quem pertinet Ordinarium Confessarium subditis sibi Monialibus, servata Apostolicarum Constitutionum forma, designare & constituere, ipse etiam eisdem extraordinarium Confessarium in vim præfati decreti, & juxta easdem Constitutiones, duobus, aut tribus per annum temporibus exhibere potest, ac debet. Quæ tamen ideò regulariter obtinere diximus; quia si Episcopus aliquis (quod Deus avertat) adeò hac in re negligens esset, ut Monialibus suis, bis, terve in anno, extraordinarii Confessarii copiam facere prætermitteret, obtendens, ut moris est, nullam hæc de re Monialibus ipsis sollicitudinem, aut curam esse; tunc volumus Dñ. Fil. nostrum S. R. E. Cardinalem modernum & pro tempore existentem Majorem Pœnitentiarium, statim ac pro parte Monialium hujusmodi requisitus fuerit, Ordinarii Pastoris negligentiam supplere debere, earumque Monasterio extraordinarium Confessarium, ex eorum tamen numero, qui ad excipiendas Monialium confessiones ab ipso Ordinario Loci approbati fuerint, cum omnibus necessariis, & opportunis facultatibus, concedere, & deputare. Quod si Præfatus Regularis eandem Concilii legem de Confessore extraordinario bis, aut ter in anno Monialibus sibi subjectis exhibendo, similiter implere neglexerit, tunc locus fiet Decreto Congregationis S. R. E. Cardinalium ad ipsius Concilii interpretationem, & executionem auctoritate Apostolica deputatorum, quo scilicet eadem Congregatio ad questionem ab Episcopo Vercellensi propositam die 23. Augusti anni MDCXXXI. rescripsit, ut infra: *Episcopus Vercellen. supplicat sibi responderi, an deputatio Confessarii extraordinarii Monialium Regularibus subjectarum spectet ad Ordinarium Loci: Sacra Congregatio censuit, ad Episcopum non pertinere, nisi in casu negligentia eorundem Regularium; ut videre licet Decretor. lib. 14. pag. 493.* Nec aliter respondit questionibus ab Episcopis Belgu exhibitis, die 6. Aprilis anni MDCXLVII. ut legitur *Decretor. lib. 18. pag. 327.* Quæ quidem rescripta & Decreta Nos etiam præsentium tenore, & Apostolica auctoritate, in omnibus, & per omnia approbamus, & confirmamus.

*Ordinarios negligens supplere debet à Cardin. Majori Pœnitentiariorum.*

*Superiorum verò Regularium, ab Ordinariis locorum.*

Quum autem Tridentina Synodus de universa quidem Monialium Communitate, ut supra, decreverit, sed nihil de singulis Monialibus statuerit, ut patet legenti Textum citati capituli 10. utque etiam jam usque ab anno MDLXXXV. judicatum fuit ab ipsa Congregatione Car-

*II. An Monialibus concedendi sint Confessarii peculiarès extra Ordinem.*

dinalium Concilii Interpretum, qui subsequens Rescriptum, quod extat *Decret. lib. 4. pag. 90. Sacra, &c. censuit, extraordinarium Confessorem offerendum non alicui Moniali singulariter, sed omnibus Monialibus univèrsè, ut omnium confessiones audire debeat; in arbitrio tamen cujusque Monialis esse, ut Confessario extraordinario velit confiteri: Hinc ortum habuit alterum controversiæ, seu dubitationis caput; an, scilicet, ubi jam univèrsæ Communitati bis, terve infra annum Confessarii extraordinarii copia facta est, & nihilominus aliqua Monialis Confessarium peculiarem extra ordinem sibi concedi petit, an, inquam, hujusmodi petitioni sit indulgendum. Id autem primo loco quæsitum fuit, proposito casu Monialis graviter ægrotantis, quæ in mortis periculo, pro spirituali consolatione, postulet, alium Sacerdotem, qui tunc non sit Ordinarius Monasterii Confessor, suprema sibi Ecclesiasticæ pietatis officia, & Pœnitentiæ Sacramentum ministrare. Huic annuendum facile esse, prædicta Congregatio pluries judicavit, ut videre est ipsius *Decretor. libr. 18. pagin. 322. à tergo, sub die 6. Aprilis anni MDCXLVII. & eodem libro pag. 586. die 22. Februarii anni MDCXLIX.* quæ pariter Decreta à Nobis præsentium tenore approbantur, & confirmantur; ut scilicet Episcopi subiectis sibi Monialibus in gravi infirmitate constitutis, & id expetentibus, peculiarem confessorium concedere debeant; iidemque etiam id ipsum præstent erga Moniales Regularibus Prælatibus subiectas, quum aliqua ex illis à suo Superiore Regulari hujusmodi gratiam impetrare non potuerit. In hoc autem casu nihil statuitur de Cardinali Majore Pœnitentiario, non ideo, quia nequeat is pro singulis Monialibus idem facere, quod supra diximus eundem pro toto Monasterio facere posse; sed quia tunc, ob temporis angustias, interclusa præsumitur via recurrenti ad ipsius Officium. Quod si nihilominus ipsius adeundi tempus & modus suppetat; ad eum pertinebit, eadem prorsus ratione peculiaribus supplicantium necessitatibus providere, quæ dictum est superius, univèrsæ Religiosæ Communitati ab ipso consulendum esse.*

*Quid in casu insuperabilis reluctantiæ adversus Confessorem ordinarium.*

Actum deinde fuit de peculiaribus quibusdam Monialibus, quæ nec corpore infirmæ, nec morti proximæ, Ordinario tamen Ministro confiteri obfirmatè recusant. Istarum quoque animi debilitas commiseranda est, & sublevanda; adeoque, ubi earum reluctantia superari nequeat, Confessarius extra ordinem deputandus est, qui



earum confessiones peculiaritèr excipiat. Id verò , circa Moniales Episcopo , seu Ordinario Loci subjectas , ab ipso Ordinario præstari debet. Quod autem ad illas pertinet , quæ Regularium regimini subsunt , ad Regularem Prælatum pertinet , servatis servandis , peculiarem ipsis destinare Confessarium ex approbatis ab Ordinario ad confessiones Monialium ; vel si Sacerdos ille , cui ejusmodi Monialis confiteri cupit , pro illis non sit approbatus , cum ipso Ordinario agendum erit , ut pro excipienda saltem illius Monialis confessione , & pro tot vicibus , quot expedire judicabitur , eundem approbet. Sin autem contingat ( neque id adeò rarum est ) ut Regularis Superior ad concedendum hujusmodi Confessarium extraordinarium Moniali communem Confessarium recusanti nullo pacto adduci possit ; jam hujus casui provisum est per Decretum anno MDLXXXIII. à prædicta Congregatione Concilii editum , & à fel. record. Gregorio Papa XIII. tunc Apostolicum Thronum obtinente approbatum , & confirmatum , quod nunc iterum confirmationis nostræ auctoritate roboramus. Decreti verba relata libro 1. *Decretorum ipsius Congregationis*, pag. 66. à tergo , hæc sunt : *Monialis per aliquod tempus noluit confiteri Confessariis Regularibus. Dubitatum fuit , an Episcopus Regiensis posset dare dictæ Moniali Confessorem alterius Ordinis Regularem , vel Sæcularem , cui illa semel , vel pluriès confiteatur peccata sua , & à quo absolvi possit. Sanctissimus Dominus Noster , etiam ex sententia Congregationis Concilii , declaravit , dictum caput decimum ita esse intelligendum , ut etiam possit Episcopus concedere Confessarium alterius Ordinis , vel Sæcularem.* Præterea nihil obstat , quo minus ipsa Monialis recursum habeat ad Cardinalem Majorem Pœnitentiarum , à quo ipsi providendum erit , ut supra dictum est , per deputationem Confessarii ex approbatis ad Moniales , apud quem illa confiteatur.

Quæsitum denique fuit de Monialibus illis , quæ neque ægrotant , neque recusant Ordinarium Pœnitentiæ Ministrum à Monasterii Prælato pro universa Communitate deputatum ; verùm pro majori animi sui quiete , atque ulteriori in via Dei progressu , facultatem petunt confitendi aliquoties Sacerdoti ad excipiendas Monialium confessiones jam approbato. Qua de re non semel Nobis in minori statu degentibus accidit , ut cum aliquibus Episcopis , aut Regularibus Monialium Superioribus agere debuerimus. Porrò in aliquos ex iis inci-

## III.

*Quid pro spirituali consolatio-  
ne , & profectu.*

dimus plus nimio severos ; qui aspera quadam verborum brevitate respondebant , quod quum Moniali postulanti libera fuisset facultas confitendi extraordinario Sacerdoti , qui universæ Communitati non semel eo anno jam datus fuerat , tunc oportebat eam conscientiæ suæ consuluisse : Quod si oblata commoditate uti noluerat , id sibi imputaret , neque pergeret Superiori molestiam asferre , ut peculiarem Confessarium extra ordinem ipsi concederet. Nobis autem objicientibus , Monialem hujusmodi ad Apostolicæ Pœnitentiariæ Officium facile recursum habituram , ibique haud agrè impetraturam id , quod ab ipsis Superioribus ei denegatum fuisset , iterum constantèr respondebant , extraordinarium hujusmodi confessarium , post impletam ab ipsis erga universum Monasterium Tridentini Concilii legem , ab alio quidem concedi posse , sed à se nunquam concessum iri.

*Nimius Prælatorum rigor improbat.*

At verò , neque tunc Nobis arridebat , neque perfectò nunc Nobis placet rigida isthæc agendi ratio ; Persuasum enim habebamus , adeoque habemus , non solum integræ Communitati , sed singulis etiam Monialibus indulgendum esse in iis rebus , quæ justè & rationabiliter petuntur , maximè quum illæ ad earum conscientiæ quietem , & securitatem conferre dignoscuntur. Neque sanè hujusmodi postulationes , aut temerè exaudiri , aut sine causa rejici debere censemus ; sed inquirendum in primis esset de qualitatibus tum Monialis , quæ Confessarium extra ordinem petit , tum confessarii , qui ab ea requiritur , ut utrisque diligentèr inspectis , deliberari possit , an illius votis annuendum sit , an non. Si enim Monialis ex una parte nullum det adversæ suspicioni locum , ex altera verò Confessarius non modò legitimam Ordinarii approbationem , sed etiam commune probitatis testimonium pro se habeat , nullo modo probare possumus tam firmum hujusmodi Prælatorum in renuendo propositum , nec intelligimus , cur post Confessarium extraordinarium integræ Communitati , juxta legem Concilii Tridentini , oblatum , nulla omnino Monialibus singulis spes relinquatur obtinendi peculiarem Confessarium , cujus consilio , & opera , justis fortassè de causis , indigere se arbitrentur. Non ita sanè hac de re sentiebat sapientissimus ille animarum Rector S. Franciscus Salesius , cujus doctrinæ summam ex illius Operibus , tum editis , tum manuscriptis , collectam , bon. mem. Joannes Petrus le Camus , Episcopus Bel-

*Cautelæ adhibendæ memorantur.*

*Sanctus Franciscus Salesius quater in anno indulgebatur extraordinarium.*

census iusto volumine complexus est, cui titulum fecit: *Spiritus Sancti Francisci Salesii*. In hujus compendio, quod ex Gallico in Italicum sermonem conversum Venetiis anno MDCCXLV. pro quarta vice Typis editum est, *part. 17. cap. 6.* aperte legitur, quod, quum Beatus Episcopus non ita intelligeret præmissum Concilii Tridentini Decretum, ut vetitum existimaret, Confessarium extraordinarium, pluribus etiam quam tribus vicibus in anno, Religiosæ Communitati offerre; quæ quidem sententia plures habet suffragatores, quos refert Diana in *Editione coordinata, tom. 7. tract. 1. resol. 348;* non solum solebat suis Monialibus Visitationis Beatæ MARIE Virginis quater in anno, videlicet in singulis Hebdomadis quatuor Temporum, Confessarium extraordinarium deputare; verumetiam earum respectivis Superioribus commendatum reliquit, ut singulis Monialibus, quæ non ex animi levitate, neque ex indiscreta affectionis singularitate, Confessarium extraordinarium peculiaritè peterent, haud se difficiles in eo concedendo præberent. Nec aliter se gerere consuevit Ven. mem. Gregorius Cardinalis Barbadius, Episcopus Patavicus; Is enim, ut testatur illius quondam Vicarius Generalis Joannes Clericatus in *Traçtatu de Pœnitentia, decis. 41. num. 7.* & Patrum Tridentinorum decretum quoad omnia Monialium Monasteria in sua Civitate, & Diocesi existentia quotannis re ipsa exequebatur, & nihilominus exorari se patiebatur à Monialibus, quæ aliquando rationabilibus de causis peculiarem pro se Confessarium expeterent. Hujusmodi regulis, & exemplis nostram quoque agendi rationem in spiritali Monialium regimine conformare curavimus; maximumque utilitatis, & quietis fructum Nos inde percepisse cognovimus. Quapropter Venerabiles Fratres Ecclesiarum Antistites, atque Dilectos Filios quarumcumque Religiosarum Mulierum Rectores hortamur in Domino, & enixè monemus, ut eandem viam, quoad fieri potest, insistere non recusent, & non adeò difficiles se præbeant peculiaribus Monialibus extraordinarium Confessarium aliquando expetentibus; quin potius, nisi aut Monialis postulantis, aut Confessarii requisiti qualitas aliter faciendum suadeat; earum justis precibus obsecundare studeant: illud cogitantes, quod etsi liberum sit cuilibet Moniali Cardinalem Majorem Pœnitentiarium adire; cui ea in re facultas cumulativa cum omnibus Locorum Ordinariis à Romano Pontifice tribuitur; nihilominus

*Nec excludebat casus peculiaris indigentia Monialium.*

*Eosdem sensus fovebat Cardin. Barbadius.*

*Pontifex hortatur Prælatos, ut justis Monialium petitionibus benigne intendant.*

ea est aliquando necessitatis urgentia, ut remedium, quod de longinquo petendum est, non satis tempètivè adveniat: Et quamvis etiam quorumlibet negotiorum expeditiones, quæ in Officio Pœnitentiariæ Apostolicæ fiunt, ab omni vel minima pecuniæ solutione inviolabiliter sint immunes; non omnibus tamen Monialibus facilè est invenire, qui earum negotia in Urbe procurare velit, & possit.

## IV.

*De qualitatibus  
Confessarii extra-  
ordinarii in gene-  
re.*

Jam verò postrema superest quæstio, nimirum de qualitatibus Confessarii extraordinarii, qui vel pro universa Monialium Communitate, vel pro aliqua Moniali peculiariter deputari debeat. Porrò nullo unquam tempore dubitatum fuit, an in hujusmodi Sacerdote ætatis maturitas, morum integritas, prudentiæ lumen requiratur, quas quidem dotes in eo, qui ad hujusmodi munus adhibetur, necessarias esse, omnes fatentur. Sicut etiam minimè dubitatur, quin idem ab Ordinario Loci specialiter pro Monialibus approbatus esse debeat, quum hujusmodi approbatio, ex Apostolicarum Constitutorum lege, omninò requiratur non solum in omnibus, tam ordinariis, quam extraordinariis Confessariis, qui Monialibus, etiam Regularibus subjectis, ab eorum respectivè Superioribus deputantur; sed etiam in iis, qui à Cardinali Majori Pœnitentiario conceduntur, etiam Apostolica Sede vacante, quo nimirum tempore amplioribus is pollet facultatibus, ut videre est in nostra Constitutione super illius facultatibus edita, quæ est 95. in Tom. 1. Bullarii nostri, ubi paragrapho 54. eidem conceditur, ut, vacante Sede, *Monialibus Confessariis extra ordinem valeat deputare, si eos ex aliqua rationabili causa petierint, pro earum libitu, inter approbatos ab Ordinario ad audiendas Monialium confessiones, eligendos.*

*An semper deputari debeat ex eo Ordine, cujus est Monasterii Prælati.*

Quamobrem ad id dumtaxat redacta est controversia, an scilicet è Clero Sæculari, an verò è Regulari eligendus sit hujusmodi Confessarius, tum inter Regulares, an assumi possit ex quolibet Ordine aliàs permisso, an verò semper deputari debeat ex ipso Ordine Prælati Regularis, ad quem Monasterii regimen spectat.

*Quid de consuetudine.*

Sanè pro Monialibus Episcopo immediatè subjectis, regula est, ut Ordinarius earum Confessor sit Sacerdos Sæcularis. Extraordinarium verò ex Ordinibus Regularibus sæpissimè assumi apud plerosque Episcopos usu receptum esse constat; deficiente fortàn per singulas Dioceses Sæcularium Presbyterorum ad id muneris idoneorum copia. Regulares autem Prælati Monialibus sibi sub-

subjectis Confessorium Ordinarium designant è suo ipsorum Ordine; extraordinarium autem etiam ex alio Ordine Regulari deputare possunt, juxta Decretum à sæpè dicta Congregatione Concilii editum die 26. Septembris anni MDXCV. ac relatum in libr. 8. Decretorum, pag. 149. à tergo, ubi sic legitur: *Sacra, &c. respondit: Superiores Regulares teneri offerre Confessorium extraordinarium ejusdem Ordinis, alterius verò Ordinis posse quidem, sed non teneri.* Nunquam tamen, quod meminimus, ullum Sacerdotem Sæcularem, aut diversi Ordinis Regularem, vidimus à Regulari Prælati Monialibus sibi subjectis extraordinarium Confessorem deputari. Denique quum aliquando evenire possit, ut in casu negligentiae Superioris Regularis, ad Episcopum; ut supra dictum est, pertineat deputatio Confessarii extraordinarii, etiam pro Monialibus Regularium regimini subjectis, nulla ipse lege tenetur ad hujusmodi Confessorium eligendum ex eo Ordine, cujus est Monasterii Prælati; sed tali casu liberum est illi quemlibet idoneum Presbyterum Sæcularem, aut alterius Ordinis Regularem, ad audiendas earum Monialium Confessiones deputare.

At quum superioribus annis Apostolicæ Sedi expositum fuisset, pluribus de causis, iisque gravissimis, quas hic referre opus non est, non tam opportunum, quam planè necessarium videri, ut Monialium Monasteria Regularium regimini subjecta, semel saltem in anno Confessorium extraordinarium diversi Ordinis Regularem, aut è Sæculari Clero Presbyterum haberent; hujus rei examen, jubente foel. recordat. Prædecessore nostro Innocentio Papa XIII. assumptum fuit à peculiari Congregatione ex quinque tunc existentibus S. R. E. Cardinalibus composita, cui Nos tunc in Minoribus constituti in Secretarii munere operam præstabamus; quæque, per annum & ultra, singulis Hebdomadis cogebatur, ad discutienda, & definienda complura Ecclesiasticarum quæstionum capita, quæ deindè inserta sunt in Apostolicis Literis ab eodem Innocentio Prædecessore editis die 13. Maii anni MDCCXXIII. quarum initium est: *Apostolici Ministerii*, quæ etiam san. mem. Prædecessore quoque Nostro Benedicto Papa XIII. in forma specifica confirmatæ fuerunt, per alias similes Literas, datas die 23. Septembris anni MDCCXXIV.

Cum autem negotia, quæ in ea Congregatione tractabantur, nullius privatas rationes attingerent, sed de  
recti.

*Regulares deputare possunt Confessarios extraordinarios etiam ex alio Ordine, vel Sæcularem.*

*Controversia sub Innocentio XIII. examinata in Congregatione particulari.*

*Ejus Congregatio-  
nis Scopus, Tri-  
dentini Concilii  
observantiam inf-  
taurare.*

restituendâ potissimum Tridentini Concilii observantia in quibusdam Catholici Orbis Regionibus, ut ferebatur, non parùm labefactata, unicè ageretur; necessarium minimè judicatum fuit, aliquem velut in judicium vocare, ad deducenda jura, si quæ sibi adversus illa, quæ decernenda viderentur, competere forsân putaret. Sed Nostra peculiaris cura erat, ad singula proposita capita totidem Dissertationes, unicuique ex præfatis Cardinalibus exhibendas, elucubrare; ad demonstranda videlicet fundamenta illius disciplinæ, quæ in usum revocanda censebatur. Nec aliter se res habuit, quum in eadem Congregatione, ut præfertur, in deliberationem venit, an decernendum foret, ut Regulares Monasteriorum Prælati, una saltem ex tribus vicibus, quibus extraordinarium Confessarium Monialibus, sibi subjectis in annos singulos exhibere debent, aliquem Sæcularem, aut alterius Ordinis Regularem Presbyterum ad id deputare tenerentur, utque ipsis hæc in re deficientibus, liberum esset Episcopis Locorum Ordinariis eorum defectum supplere, & emendare.

*Nihilominus in  
hoc casu, admisi  
sunt Regulares ad  
contradicendum.*

Verùm quum Regularibus innotuisset, à prædicta Congregatione conditum esse Decretum eorum intentioni contrarium, utpotè qui minimè adstringi volebant ad hujusmodi annuam deputationem Confessorum extraordinariorum è Clero Sæculari, vel ex aliis Ordinibus; nonnullarum Religionum Procuratores Generales petierunt admitti ad deducendas rationes, quas hujusmodi Decreto obstare putabant; Cumque id facilè impetrassent, ac suam, totiusque Cœtus Regularium causam per eximios illius temporis in Romana Curia Advocatos defendi curassent; sed nihilominus prædicta Cardinalium Congregatio in priori sententia permanisset; placuit præfato Prædecessori Innocentio, antequam Decretum hujusmodi approbatione sua confirmaret, aliorum Cardinalium sententias audire. Itaque exclusis illis omnibus, qui ex ipsius Pontificis deputatione in præcedentibus Sessioibus per annum integrum negotia discussierant, aliisque advocatis Cardinalibus, quibus exhiberi secretò fecerat conscriptarum allegationum exempla; Nobis etiam adesse iussis, qui rationum momenta à priori Congregatione præ oculis habita, si opus esset, exponere possemus; novam Cardinalium Congregationem ex improvviso coram se convocavit, in qua iterùm proposita quæstio diligentèr, ac maturè discussa fuit; ac demùm ipse Pontifex, de ipsius Congregationis consilio,

*Novæ cautele à  
Pontif. adhibitæ.*

& assensu, super hac re decrevit, ut sequitur : *Cumque ex eodem Concilio Tridentino Confessor extraordinarius bis, aut ter in anno offerri Monialibus debeat, qui omnium Confessiones audiat; si in posterum Superiores Regulares, quoad Monasteria ipsis subiecta, toties predictum extraordinarium Confessorem deputare neglexerint, vel si etiam ex proprio eorum Ordine semper deputaverint, nec saltem semel in anno ad id munus elegerint Sacerdotem aut Sacularem, aut Regularem alterius diversi Ordinis professorem, in his casibus Episcopi, pro sui arbitrio, & conscientia, deputationem huiusmodi facere possint, nec illa quovis titulo, aut pretextu, à Superioribus Regularibus valeat impediri.*

*Tenor resolutionis à Pontifice tunc edita.*

Perscriptum sanè fuit huiusmodi Decretum ea occasione, qua agebatur de restituenda in certis quibusdam Regionibus Ecclesiastica disciplina ad formam Concilii Tridentini; verum ipsius Decreti vigor ad eas dumtaxat Regiones minimè restrictus fuit; quum & animatum pericula, quæ ex perpetua Confessorum ejusdem Ordinis deputatione timebantur, in omnibus Monasteriis Regularium regimini subiectis, locum habere possint, & quæcumque adversus Decretum ipsum adducta fuerunt, ex generalibus Ordinum Statutis, & ex Constitutionibus Monialium Regularibus subiectarum, fuerint desumpta. Cumque iudicatum fuerit, ea omnia nequaquam obstare, quo minus ita decerneretur; sequitur, ut, quamvis eidem Decreto causas dederint peculiarium quarundam Regionum necessitates Apostolicæ Sedi eo tempore expositæ; illud tamen generale sit, & universos per Orbem Regulares Monasteriorum Monialium Prælatos afficere debeat. Cum verò deinde alter laudatus Prædecessor Benedictus XIII. Innocentii Literas in forma specifica confirmavit, Nobis constat, illius mentem fuisse, ut huiusmodi Decretum universalis, & in violabilis legis vim obtineret. Super quo nihilominus ne ulla apud aliquos supersit dubitatio; Nos ipsi, præsentium Literarum vigore, ac Motu proprio, & certa scientia; deque Apostolicæ potestatis plenitudine, ipsum relatum Innocentii Prædecessoris Decretum, statutum, mandatum, atque præceptum, ad omnia per Orbem ubique existentia, & Regularium regimini subiecta Monialium Monasteria, quatenus opus sit, expressè extendentes & ampliantes; decernimus atque statuimus, ut singulis annis, incipiendo à proximo millesimo septingentesimo, quadragesimo nono à Nativitate Domini de-

*Ea generalis est, & ubique observanda.*

*Pontifex eam expressè extendit ad omnia Monasteria Regularibus subiecta, cum præcepto, &c.*

decurrendo, Regulares Monasteriorum Prælati teneantur, bis, aut ter in anno Confessarium extraordinarium universis Monialibus in iis degentibus offerre; si verò ipsi forsân hujusmodi Confessarii extraordinarii deputaciones intra præscripta tempora omiserint, vel semper proprii Ordinis Regularem Sacerdotem ad hunc effectum deputaverint; ita ut præfatæ Moniales semel saltem in anno Confessarium extraordinarium è Clero Sæculari, aut ex alio Ordine Regulari non habeant, ad Episcopos Dicecesanos, omni appellatione remota, devolvatur jus supplendi eorundem Prælatorum defectum (si nempe pensatis rerum circumstantiis, ita expediens esse judicaverint) per deputationem Confessarii extraordinarii, quem tam in uno, quàm in altero casu, aut è Clero Sæculari, aut ex alio Regulari Ordine, pro ipsorum arbitrio, deligere possint, & valeant.

*Commissio Card.  
Urbs. Vicario pro  
præmissorum executione.*

Quocircâ dilecto Filio nostro Sanctæ Romanæ Ecclesiæ Cardinali, moderno Nostro, & pro tempore existenti Romani Pontificis in Urbe ejusque districtu Vicario in Spiritualibus Generali, earundem præsentium tenore committimus, & mandamus, ut hæc nostra Decreta, atque Statuta, tam in omnibus ejusdem Almæ Urbis Monasteriis, quæ Regularium regimini subsunt, quam in aliis quibusque Regularium, aut Sæcularium Mulierum, aut Puellarum Domibus, seu Collegiis, atque Conservatoriis, quibus unicuique ordinarius Confessor à Superioribus deputari solet, in omnibus & per omnia, juxta earundem Literarum præscriptum, exactissimè observari, & adimpleri faciat; ne forte audiri contingat, quod cum magna animi nostri molestia dictum aliquando esse cognovimus, Apostolicas Constitutiones Romæ quidem ferri, & publicari, sed eas minimè in ipsa Urbe ad effectum perducere.

*Item omnibus Patriarchis, Archiepiscopis, & Episcopis.*

Eandem porro curam, & sollicitudinem injungimus, & demandamus Venerabilibus Fratribus Patriarchis, Primatibus, Archiepiscopis, & Episcopis per omnes universi Orbis Ecclesias constitutis; quibus, ut satis perspectum putamus voluntatis nostræ studium, tam in eorum rationabilibus querelis, justisque petitionibus suscipiendis, quàm in corruptelis, quas irrepsisse indicaverint, eliminandis; idque non ex ingenio nostro quidquam statuendo, nec peregrinas novitates inducendo, sed veteres ut plurimum leges, & regulas, vigili Prædecessorum nostrorum providentia jam pridem constitutas; in pristinum, debitumque vigorem & usum revocand.



cando; Ita eosdem meminisse volumus, proprium zeli Pastoralis officium non in eo situm esse, ut adversus ea, quæ contra leges fiunt, inutilitèr deplorando declament; sed ut illa de medio tollere curent, adhibitis opportunis remediis in eum finem jam præstitutis; implorato etiam Apostolicæ Sedis auxilio, ubi impedimentum aliquod eorum auctoritati, & legum executioni afferri contingat, omnesque diligentis, & curas, quas corrigendis abusibus ipsi fidelitèr impenderint, in irritum cedere videant.

Quoniam verò tam in superius allegato Clementis XI. Edicto, quàm in Synodalibus plurimum Episcoporum Constitutionibus statutum esse conspiciamus, ut quo tempore extraordinarius Confessor alicui Communitati deputatus ministerio suo fungitur, ordinarius Confessor nullum ipsi impedimentum asserre audeat; multòque minùs præsumat per id temporis alicujus Monialis, sive Superiorissæ, sive Novitiæ, sive Conversæ, neque demùm alterius cujuscumque personæ intra septa Monasterii, aut piæ Domus commorantis, Sacramentalem Confessionem audire; Nos, id quoque approbatione nostra roborantes & confirmantes, statuimus, & mandamus, ut Episcopi quidem, si de Monasteriis, aut Domibus eorum regimini subiectis agatur, Regulares autem Superiores, quod ad illas Communitates attinet, quibus ipsi præsunt, pro hujusmodi Legis implemento advigilent, & contravenientes meritis pœnis coerceant, & afficiant.

Ac demùm quibuscumque Confessariis extraordinariis, qui vel alicui Communitati generalitèr, vel peculiaritèr alicui personæ in Monasterio degenti, concessi, ac deputati fuerint, districtè inhibemus, sub pœnis adversus accedentes ad Monasteria Monialium, & cum ipsis conversantes, præsertim Regulares, à Prædecessoribus nostris quandocumque statuti (quas etiam præsentium vigore confirmamus, & innovamus) ne, postquam suum officium impleverint, ad idem Monasterium ulterius accedere, aut ullius generis commercium intra ipsum quomodocumque continuare & fovere, etiam sub spiritualis causæ, aut necessitatis obtentu & colore, audeant, aut præsumant.

Decernentes, ipsas præsentis Literas, atque omnia, & singula in eis statuta, atque præscripta, etiam si quicumque in iisdem interesse habentes, seu habere prætendentis, ad id vocati, & auditi non fuerint, nec præmissis consenserint, aut alterius cujuscumque generis

*Durante Confessarii extraordinarii munere, Ordinarii Confessarii munus cesset.*

*Extraordinarius verò, expleto officio, se abstineat, etiam ab accessu ad Clausura.*

*Clausula pro præmissorum firmitate.*

ris defectus forsân adversûs eas objiciatur, semper, & perpetuo valida, & efficacia esse, & fore, & ab omnibus, ad quos spectat, atque in futurum spectabit, inviolabiliter etiam perpetuò observari. Sicque, & non aliter, in præmissis per quoscumque Judices Ordinarios, & Delegatos, etiam Causarum Palatii Apostolici Auditores, & Sanctæ Romanæ Ecclesiæ Cardinalium Congregationes ordinarias, aut peculiariter deputatas, aliosque Cardinales, etiam de Latere Legatos, ac Vice-Legatos, & Apostolicæ Sedis Nuntios, judicari, & definiiri debere; sublata eis, & eorum cuilibet, aliter judicandi, definiendi, ac interpretandi facultate, & auctoritate; atque irritum, & inane decernentes, quidquid secûs à quoquam scienter, vel ignoranter contigerit attentari.

*Derogatio contrariis.*

Non obstantibus quibuscumque etiam Apostolicis, ac in Universalibus, Provincialibus, & Synodalibus Conciliis editis generalibus, vel specialibus Constitutionibus, & Ordinationibus; necnon quarumcumque Ecclesiarum, & Ordinum Regularium, seu Congregationum, aut Societarum, & Institutorum, etiam S. Joannis Hierosolymitani, aliorumque Militarium Ordinum, seu Monasteriorum Virorum, aut Monialium, aliarumque piarum Domuum, etiam juramento, confirmatione Apostolica, vel quavis firmitate alia roboratis statutis, usibus, & consuetudinibus, etiam immemorabilibus; Privilegiis quoque, exemptionibus, & indultis, etiam in corpore juris clausis, aut Literis Apostolicis, cuilibet præmissorum, sub quibuscumque verborum tenoribus, & formis, etiam hic de necessitate exprimendis, ac cum quibusvis clausulis, & decretis, etiam irritantibus in genere, vel in specie, & derogatoriis derogatoriis, quomodolibet in contrarium concessis, ac pluries confirmatis, approbatis, & innovatis; quibus omnibus, & singulis, hæc vice dumtaxat, & ad præmissorum effectum, illis aliàs in suo robore permansuris, de Apostolicæ potestatis plenitudine derogamus, cæterisque contrariis quibuscumque.

*Fides præstanda transumptis.*

Volumus demùm, ut earundem præsentium transumptis, seu exemplis, etiam impressis, manu alicujus Notarii publici subscriptis, & sigillo Personæ in Ecclesiastica Dignitate constitutæ munitis, eadem prorsus fides, tam in judicio, quàm extra illud, ubique locorum habeatur; quæ ipsis præsentibus haberetur, si forent exhibitæ, vel ostensæ.

*Sanctio.*

Nulli ergo omninò hominum liceat paginam hanc nostrarum confirmationis, approbationis, innovationis, volun-

voluntatis, mandati, statuti, decreti, & declarationis infringere, vel ei ausu temerario contraire. Si quis autem hoc attentare præsumperit, indignationem Omnipotentis Dei, ac Beatorum Petri, & Pauli Apostolorum ejus se noverit incursum.

Datum Romæ apud Sanctam Mariam Majorem *Dat. Pontificatus*  
Anno Incarnationis Dominicæ M.DCC.XLVIII. Nonis *anno 8. die 5. Au-*  
Augusti, Pontificatus nostri Anno Octavo. *gusti 1748.*

*D. Card. Pafsioneus.*

J. Datarius.

VISA  
de Curia J. C. Boschi.

J. B. Eugenius.

Loco ✠ Plumbi.

*Registrata in Secretaria Brevium.*

**A**Nno á Nativitate Domini Nostri Jesu-Christi millesimo septingentesimo quadragesimo octavo, Indictione undecima, die verò vigesima sexta Augusti, Pontificatus autem Sanctissimi in Christo Patris, & Domini Nostri D. BENEDICTI, Divina Providentia, PAPÆ XIV. Anno Nono, supradicta Constitutio affixa, & publicata fuit ad Valvas Basilicæ Lateranensis, & Principis Apostolorum, & Cancellariæ Apostolicæ, Curæque Generalis in Monte Citatorio, & in Acie Campi Floræ, ac in aliis locis solitis, & consuetis Urbis per me Dominicum Contini, Apost. Curf. -- Horatius Mugnaini, Mag. Curf.

*Conuerda con la Bula, que el Ilustrissimo, y Reverendissimo Señor Nuncio de su Santidad en estos Reynos remitió al Ilustrissimo Señor Co-Administrador Don Gabríel Torres de Navarra, para que se publicasse, y observasse en este Arzobispado de Sevilla.*

*Doct. Miguel Joseph de Cosío.*